

# *APHILA, AFA, ANGCWATJWA, AVUKA, ABUYA*

 Kungetulu nje kakhulu kwanoma yini lebesingayivakalisa ngetilwimi tebantfu, kutsi tinhlitiyo tetfu tiva kunjani, namuhla, njengoba sibutsana lapha kuloku lokunesizotsa kakhulu, kusa lokungewe. Lokusa loku kumelele sikhatsi lapho inkholo yetfu yentiwa yabangulephatsekako sibili, ngoba kwakukuvuka futsi kweMntfwana waKho loligugu Lowetela kutohlenga sonkhe sive lesibantfu. Futsi silapha manje ekuseni emcimbini, waloko kuncoba lokukhulu, lokuphakeme, Nkhosi, lokwasenta saba ngetulu kwebancobi kuko kokubili kufa, sihogo nelithuna. Futsi siyaKubonga kutsi, emvakwekuba sekwendlule yonkhe leminyaka, sisasolo sibutsana kusesekuseni kakhulu kulokusa kweliPhasika, kutoMkhonta, ngoba sikholwa kutsi Utobuya futsi.

<sup>2</sup> Futsi sitokhulekela kutsi Utotitsetselela tonkhe tono tetfu netiphambeko tetfu lesicoshwe samelana natsi, njengoba ngekutitfoba sivuma liphutsa letfu, futsi semukela kubuyisana kwaKhe nganca yetono tetfu. Philisa kugula lokusemkhatsini wetfu, Nkhosi. Sisite sisafundza Livi laKho leliNgcwele, lelisisekelo sawo onkhe emaCiniso Losishiyele wona kutsi siphile ngawo futsi sikholve.

<sup>3</sup> Futsi sikhulekela hhayi lelicembu lelibutsene lapha kuphela, kodvwa emhlabeni wonkhe jikelele, ngoba sibuke ngemehlo lalangatelele netinhlitiyo letilangatelele kubuya kwaKhe. Sime namuhla ebumnyameni, encushuncushwini, kutsi uma, cishe impela nganoma ngusiphi sikhatsi, kutsi lolunye luhlanya lungahle lichumise cishe ngalokutsite, futsi lufacate likinobho lelincane, futsi lente umhlabu wonkhe kutsi uchunyiswe ube ticucwana. Njengoba sikutjelwe tikhulu letinkhulu, kutsi, imphi iyotsatsa kuphela ema-awa lambalwa, uma kuke kwaphindze kwenteka futsi. O! Njengoba sime namuhla kulo impela lugu lwalenyi imphi. Manje-ke, liBandla lime elugwini, loko kuvuka ekufeni lokuligugu lelikhulu kakhulu, ngoba siyohlwitfwa kanyekanye nalabangcwele labalele, kutsi sihlangabete iNkhosi emoyeni, futsi sibe na Yo njalonjalo.

<sup>4</sup> Site kutokhonta Wena, Nkhosi. Futsi semukele namuhla. Busisa kufundvwa kweLivi laKho, kuhlatjelwa kwetingoma, kushunyayelwa kweliVangeli, yemukela imikhuleko yalotisolako. Vani umkhuleko ngalabagulako, futsi utfole ludvumo loluya kuWe lucobo, ngoba sikucela ngekutitfoba eGameni laJesu, iNdvodzana yaKho. Ameni.

<sup>5</sup> Kini nine lenitsandza kutsatsa lapho sitofundza khona manje ekuseni, kwemiBhalo yetfu.

<sup>6</sup> Futsi ncesini kutsi—kutsi kwati kutsi site indzawo yekuhlala yalelicembu lelihle lebantfu lofike manje ekuseni kakhulu kutokhonta kanye natsi, labavela emabandleni lehlukene nasetifundzeni letehlukene, futsi ngisho nasetiveni letehlukene, sibutsene manje ekuseni lapha eTabernakeli, ngaloku kukhontwa kweNkhosi lokuligugu lelikhulu.

<sup>7</sup> Ngifisa kutsi nivule eNewadzini yeTihlabelelo, Tihlabelelo 22. Ngiyati kutsi lena yindzawo lengakejwayeleki kufundza kuyo, kwentela inkonzo yeliPhasika, kodvwa Nkulunkulu ungelongakejwayeleki.

<sup>8</sup> Futsi manje emvakwalenkonzo, sitotsi kuhlabu likhefu cishe li-awa linye, kute nikhone kuhamba niye ekudleni kwenu kwasekuseni. Bese-ke inkonzo yaSontfo sikolwa itocala igabence insimbi yemfica. Bese kutsi-ke masinyane emvakwenkonzo yaSontfo sikolwa, kutobanenkonzo yembhabhatiso lapha e—echibini. Bese-ke kulentsambama lena, ngensimbi yesitfupha, emakhadi ekukhulekelwa atokhishelwa inkonzo yekuphilisa, yakusihlwa. Futsi uma ninalabatsandzekako logulako nalodzingako, nikhumbule kubakhipha nibaletse kusihlwa, futsi, ngoba lesi kutoba sikhatsi sekugcina lesingaba nalena kube ye—yesikhashana, empeleni. Ngiyahamba ekuseni, ngensimbi yesihlanu, ngiya eLos Angeles naseWest Coast, ngiyela luchungechunge lwetinkonzo.

<sup>9</sup> Manje eTihlabelelweni 22, sitofundza.

*Nkulunkulu wami, Nkulunkulu wami, ungishiyeleni na? ukhashane leni nekungisita, . . . emavini ekubhodla kwami na?*

*. . . Nkulunkulu wami, ngikhala emini, kepha wena awuva; nasesikhatsini sasebusuku, futsi ngingathuli.*

*Kodvwa wena ungelongcwiele, O wena lohlala etindvumisweni ta-Israyeli.*

*Bobabe betfu bebetsembela kuwe: bebetsemba futsi wena wabakhulula.*

*Bakhala kuwe, futsi bakhululwa: betsembela kuwe, futsi abazange bajabhiswe.*

*Kodvwa mine ngiyimphetu, futsi angisuye umuntfu; ngilihlazo kubantu, . . . ngidzelelwa bantu.*

*Bonkhe labo labangibonako bayangihleka kungihhalatisa: badvubule umlomo, futsi banikina inhloko, batsi,*

*Beketsembe iNKHOSI kutsi itomsindzisa: ayimkhulule, njengoba atfokota kuyo.*

*Kodvwa nguwe lowangikhipha esinyeni: waba litsema lami ngisesemabeleni amake.*

*Ngaphonswa etikwakho kusukela esiswini: wena unguNkulunkulu wami kwasesiswini samake.*

*Ungabi khashane nami; ngoba inkhatsato isedvute; ngoba kute lositako.*

*Tinkunzi letinengi tingikakile: tinkunzi letinemandla taseBhashani tingitungeletile ndzawotonkhe.*

*Tingikhamele imilomo yato, njengalelibhashako futsi... libhubesi lelibhodlako.*

*Ngicitsiwe njengemanti,... onkhe ematsambo ami aphumile elungeni: inhlitiyo yami injengemtfwebeba; incitsikele ngekhatsi kwetibilini tami.*

*Emandla ami omile njengeludzengelo;... lulwimi lwami lunamatsela emihlatsini yami; futsi wena ungiletse elutfulini lwemhlaba.*

*Ngoba tinja tingikakile: imibutsano yalababi ingivalele: tandla tami netinyawo tami batibhobozile.*

*Ngingabala onkhe ematsambo ami: kutsi ayangibuka angihlahlele emehlo.*

*Babelana tembatfo tami,... bentelana inkatho ngempahahla yami.*

*... wena ungabi khashane nami, O NKHOSI:... mandla ami, shesha ungisite.*

*Sindzisa umphefumulo wami enkembeni; s'thandwa sami emandleni enja.*

*Ngisindzise emlonyeni welibhubesi: ngoba wena ungvile kusukela etimphondvweni tesilwanelisisahhashi.*

*Ngiyomemetela ligama lakho kubazalwane bami: ngikudvumise emkhatsini welibandla.*

*Ya... Nine leniyesabako iNKHOSI, mdvumiseni; nine nonkhe tintalo taJakobe, mdvumiseni; futsi nimesabe nine nonkhe, tintalo ta-Israyeli.*

*Ngoba akedzeleli kanjalo futsi akanengwanga yinhlupheko... kanjalo futsi akamfihlelanga buso bakhe; kodvwa uma akhala kuye, weva.*

*Indvumiso yami iyoba kuwe ebandleni lelikhulu: ngitawufeza tifungo tami embikwabo labamesabako.*

*Labamnene bayokudla futsi besutse: bayodvumisa iNKHOSI labo labayifunako: inhlitiyo yakho iyophila kute kubephakadze.*

*Yonkhe imikhawulo yemhlaba iyokhumbula futsi iphendvukele eNKHOSINI: neminden iyonkhe netive tiyokhuleka ebusweni bayo.*

*Ngoba umbuso weNKHOSI: futsi ngiyo lebusako emkhatsini wetive.*

*Bonkhe labo labacebile bemhlaba bayokudla futsi bakhonte: bonkhe labo labelela elutfulini bayokhotsama phambi kwayo: futsi kute longakhona kutigcinela umphefumulo wakhe uphila.*

*Intalo iyomkhonta; kuyobalelwaa eNkhosini situkulwane lesitako.*

*Bayokuta, futsi bayomemetela kulunga kwayo kubantfu futsi bayo...lesiyotalwa, ngekutsi ikwentile loku.*

<sup>10</sup> Kwangatsi iNkhosi ingeneta tibusiso taYo ekufundvweni kweLivi laYo. Ngifuna kutsatsa kwalomcimbi manje ekuseni, emagama lasihlanu, futsi ngakulawomagama lasihlanu ngitame kuvakalisa lokusenhlitiyweni yami, kini nine tikhonti manje ekuseni. Ngifuna lamagama lawa lasihlanu: *Aphila, Afa, Angcwatjwa, Avuka, Abuya*.

<sup>11</sup> Futsi ngicabanga kutsi imbongi yakuvakalisa kahle eculwenni, ngaloko lengitotsandza kukusho, ngesikhatsi ibhala leliculo.

Aphila, Wangitsandza. Afa, Wangisindzisa.  
Angewatjwa, Watfwala tono tami taya  
khashane le.

Avuka, Walungisia ngesihle phakadze,  
Ngalelinye lilanga Uyabuya, o, lusuku  
loluyinkhatimulo!

<sup>12</sup> Ayizange seyibekhona imphilo leyake yaphilwa lenjengeyaKhe, ngoba BekanguNkulunkulu abonakaliswe enyameni ngesikhatsi Atalwa. Bekakuvetwa kwaloko Nkulunkulu Babe langiko. NaNkulunkulu Babe alutsandvo, ngako-ke Jesu bekakuvetwa lokugcwele kwelutsandvo. Bekalutsandvo kusukela nje esikhatsini sekucala kutsi tandla taKhe teluswane loluncane tiphulula tindzebe letinhle tamake waLo. Bekalutsandvo.

<sup>13</sup> Futsi ngicabanga kutsi namuhla ngulapho la labanengi ehluleka khona kucondza kutsi Bekalutsandvo. "Nkulunkulu ulutsandvo, nalabo labatsandzako batalwa nguNkulunkulu."

<sup>14</sup> "Nkulunkulu walitsandza live kangaka, lokukutsi, longatsandzeki, kutsi Wanikela ngeNdvodzana yaKhe letelwe yodvwa, kutsi ngulowo nalowo lokholwa ngiYo akayubhubha, kodvwa uyoba nekuPhila lokuphakadze."

<sup>15</sup> Waveta lutsandvo IwaKhe ngesikhatsi Alapha emhlabeni, ngetindlela letinengi kakhulu letehlukene, sekuze

kungaphikiseki kutsi Bekasidalwa lesitsandza kwendlula tonkhe letake taphila. Futsi ngicabanga kutsi, emphilwени yaKhe lapha, Bekaveta Nkulunkulu. Futsi indlela kuphela Nkulunkulu langavetwa ngayo kubantfu kungelutsandvo.

<sup>16</sup> Futsi Wakwenta kahle loku ngesikhatsi Abamba lomunye webesifazane lababi kakhulu kunabo bonkhe lobekakhona elusukwini lwaKhe, mhlawumbe. Bamtfola nje anelicala, futsi ingekho indlela yekuphuma, ngesikhatsi atfolakala asekuphingeni. Base bamhudvulela phambi kwaKhe, futsi batsi, "Wena utsi Akentelwe ini?"

<sup>17</sup> Futsi lapho Agucukela kuye, futsi, watsi, "Angikulahli. Hamba ungabe usona." Esikhundleni sekumphonsela ngephandle etitaladini, kutsi ahudvulelwe ngephandle kuhle kwesicuku setimpishi etikwakhe, kutsi bamgcobe ngematje futsi basuse kuphila kwakhe; yaKhe letsambile, lenemusa, inhlitiyo letsandzako yehla yayongena phansi le esonweni lebekakuso, watsi, "Angikulahli. Hamba nje ungabe usona."

<sup>18</sup> Futsi ngesikhatsi Asendleleni Yakhe aya ethuneni laLazaru, ngicabanga kutsi leso kwakungulesinye sikhatsi lesikhulu Laveta ngaso kutsi Nkulunkulu uyini etidalweni letibantfu. Akusuye Nkulunkulu kuphela longatsetselela sono lesiphansi kunato tonkhe lesingentiwa, futsi utsatsa labanelicala futsi abente bangabi nelicala, ngelutsandvo lwaKhe lolucolelako, kodvwa emvakwekuba kufa sekusilalisile sithulile, Usasolo akhatsatekile ngatsi. Ngicabanga kutsi Wakuveta kahle loko asendleleni ehla naMata naMariya, ngesikhatsi Efika endlimi lapho kufa kwase kuvalele kuphila kwemuntfu lotsandzekako. Futsi Asendleleni lebheke ethuneni, noko, anguNkulunkulu, wati kutsi bekatoMvusa kulabafile, wati kutsi kwakushitiwo kuYe kutsi kuwo wona kanye emaVi aKhe kwakulele eMandla ekumvusa ethuneni; noko, ngesikhatsi Sekabone Mata naMariya nalabo bebamtsandza Lazaru, bakhala, liBhayibheli latsi Wakhala. Kwakuyini na? Inhlitiyo yaKhe letsandzako lenkhulu! Ngesikhatsi Sekabone lowomuntfu, nebangani baKhe—baKhe basenkhatsatweni, Wakhatsateka kanye nabo.

<sup>19</sup> Ngijabula kakhulu kwati kutsi Angatfolakala ngekhatsi kwetinhilitiyo letephukile. Etinsizini tetfu, Akasuye lowo longasishiya. Uma ngakitsi lapho konkhe sekwehlulekile, nematsema ekugcina ekufinyelela kwasemhlabeni sekefike ekugcineni kwalo, Usasolo anguNkulunkulu futsi Uyasitsandza. Bekakuveta kwaNkulunkulu.

<sup>20</sup> Futsi, o, ngikholwa kanjani pho kutsi Uyabalangatelela bantfu baKhe kutsi bagcotjwe kakhulu ngaMoya waKhe, kutsi besingaya kulomunye ngamunye etivivinyweni nasetinkhatsatweni, futsi siletse kuvakaliswa kwekuvelana kwaKhe, lapho kutfululeka kuvela etinhilitiyweni tetfu lesitelwe ngaMoya waKhe, kubonisa ebandleni lutsandvo lwaNkulunkulu

lophilako. Loko kwaveta kahle loko Lakusho, noma imbongi leyakusho.

Aphila, Wangitsanza.

<sup>21</sup> Wakhombisa Lakwenta esiveni sonkhe lesibantfu, indlela Nkulunkulu Lammelela ngayo kuJesu Khristu. Waveta umbono waKhe esiveni lesibantfu, kutsetselela nekutsandza labo lebebangatsandzeki. Futsi ngiyatibuta, kulokusa loku kweliPhasika, kutsi sisilele kangakanani kuloko. Besingatsandza labo labasitsandzako, kodvwa Watsandza labo lebebangaMtsandzi.

<sup>22</sup> Bekangulomkhulu kunabo bonkhe, kumelelwa kwekucala, kwelutsandvo lokwake kwashaya emhlabeni; futsi wedzelelwa ngulabo lebebaphila emhlabeni, labo Lebekabatsandza. Akukhomuntfu lobekangake atsandze njengaYe; futsi akukho muntfu lowake watondvwa njengaYe. BaMtondza futsi baMedzelela, futsi baMencaba, kodvwa akulumisanga lutsandvo IwaKhe. Kwekugcina, ngesikhatsi Alenga esiphambanweni, emvakwekuba leyomphilo Lebekayiphilile leyayikadze ingentanga lutfo ngaphandle kwetintfo letinhle, itsetselela labanelicala, iphilisa labagulako, futsi nje tintfo letatinhle. Ngesikhatsi Yena a...kuphefumula kwekugcina esiphambanweni, nenhlamba, sikhwehlela sekuphukutwa, salabo lebebeme ngakhona; silenga ebusweni baKhe lobungewe Wamemeta, ngenhlitiyo legcweli lutsandvo, “Babe, batsetselele, ngoba abakwati labakwentako.”

<sup>23</sup> Bekacondza. AnguNkulunkulu, Uyacondza. Kungako Wakhona kusitsandza ngesikhatsi singatsandzeki, ngoba UngoNkulunkulu futsi Uyacondza. “Aphila, Wangitsanza.” Ayikaze ibekhona imphilo leyake yaphilwa njengako, ngoba yayigocotelwe elutsandvweni.

Afa, Wangisindzisa.

<sup>24</sup> Kufa, ngesikhatsi aseNsmini yase-Edeni, Nkulunkulu Jehova bekadzinga, inhlawulo yesono kufa, futsi kwakungeke kubekhona lokuntjintjwako. Kwakungeke kube ngulenye indlela letsatfwako, kunakekelwa ngayo. Ngoba, Nkulunkulu uphakeme kwendlula konkhe, futsi Ungulongenasiphetfo, neMehluleli wawo onkhe emaZulu nemhlabo. Yini sijeziso sesono kufa, futsi kwakungekho namunye lobekangakhokhela lomunye lesijeziso. Ngoba wonkhe umuntfu, naloku nje bekangahle amfele lomuny’umuntfu, kodvwa bekanelicala kwekucala nje. Kwakungekho namunye wetfu lobekangasita lomunye, ngoba sonkhe sasinelicala. “Sitalelw esonweni, sabunjwa ebubini, seta emhlabeni sikhuluma emanga.” Futsi kwakungekho nemsebe lomncane welitsembo, ungekho ndzawo. Sasilahlelwe ekufeni, nguNkulunkulu, futsi sonkhe sidalwa lesake sahamba emhlabeni sasingephansi kwalokulahlwa loku.

Kwakungaba khona emadvodza lalungile lavukako futsi ente tintfo letinkhulu, kodvwa yayisoni kwekucala nje.

<sup>25</sup> Kwakunendlela yinye kuphela kuso kutsi sibhadalwe, naleyo kwakukufa kwaNkulunkulu lucobo lwaKhe. Ngako Nkulunkulu, anguMoya, bekangeke afe, kodvwa Wehla waba semtimbeni wenyama wase Utiveta emphilweni yelutsandvo; kutsatsa konkhe loko kulunga Lebekangiko, futsi wanikela ngekutitsandzela njengeMhlatjelo lophakeme kwendlula konkhe, kuze Akhone kutsatsa licala lalonelicala. Sonkhe sitoni nje, futsi kungekho ndlela eveni kitsi kutsi sike sisindziswe. Aketelanga kona kuphela kutsi abonwe emhlabeni, kodvwa Wetela kutokufa njengeMhlatjelo.

<sup>26</sup> Abela wakuweta ngesikhatsi anikela kuNkulunkulu ngemhlatjelo lomuhle kunewaKhayini; ngesikhatsi aletsa liwundlu lelincane, nesigamu semvini wemagelebisi sitongolotelwe entsanyeni yalo, aliyisa edvwaleni. Nako kulele lomfo lomncane etikwelidvwala, walidvonsela emuva ngesilevana futsi, nge—ngelidvwala, walishaya entsanyeni yalo lencane; futsi lalikhala futsi lifa, nengati intjaza, nesihlutfu salo lesincane lesimhlophe saba ngulesibhukushe engatini. Abela waveta iKhalvari lapho.

<sup>27</sup> Ngesikhatsi liWundlu laNkulunkulu, lelihlatjiwe kusukela kwasekelwa umhlabo, letela kutotsatsa indzawo yetoni letinelicala, futsi labondvwa futsi lahbulwa, futsi—futsi lahhataliswa futsi bahlekisa ngalo, futsi lafa kufa lokungekho sidalwa lebesingakufa ngaphandle kwaNkulunkulu lucobo lwaKhe, nesihlutfu saLo lesinengati silenga emahlombe aLo, litfontsel aLo, litfontsel emhlabatsini, liveta kutsi sono siyintfo lembi kabi kanjani, ngesikhatsi kudzingeka kutsi Life kutsi lihlenga umuntfu emphilweni yesono. Akukho lokwakungafa kanjalo. Akukho lokwakungamela loko kufa. Kwasho kutsi, “Ngesikhatsi bagwaza luhlangotsi lwaKhe, kutsi, kwaphuma iNgati nemanti.”

<sup>28</sup> Sekusikhatsi lesitsite lesendlulile, ngangikhulumna nalomunye ngaloku. Futsi kwakungusosayensi lowatsi, “Yinye kuphela indlela loko lokwakungenteka ngayo. Futsi kwakungesiko ngenca yalesikhali semaRoma, lesabangela kutsi Afe; futsi kanjalo kwakungesiko kulahleka kweNgati, lokwabangela kutsi Afe, ngoba yayisesekhona iNgati emtimbeni waKhe. LolokwaMbulala, kwakungasiko ngenca yesikhali semaRoma noma letipikili letabetselwa etandleni taKhe, noma lomchele lonemanyeva labawubeka enhloko yaKhe. Kodvwa ngoba... Wabulawa buhlungu belusizi, ngoba Weta kubaKhe luCobo kepha baKhe luCobo abaMemukelanga. Wabulawa kudzabuka enhlitiywensi. Ngesikhatsi, Bekati tona kanye tidalwa tesikhatsi, Lebekatotifela kutsi atihlenge, tatikhafulele buso Bakhe, futsi Wencatjwa ngumuntfu.”

<sup>29</sup> Davide, iminyaka lengemakhulu layimfica kungakenteki, wakhala ngalolona lelophimbo Lakhala ngalo eKhalvari, “Nkulunkulu wami, UNgishiyeleni na?”

<sup>30</sup> Intfo lembi kabi kangaka pho sono lesiyentako, sehlukanisa umuntfu kuNkulunkulu! Futsi Bekangumnikelo wesono lowawufanele unikelwe ngenga yetono tetfu. Futsi Wehlukaniswa neBukhona baNkulunkulu. Sono sasiMehlukanisile. Nkulunkulu wabeka tono tetfu etikwaKhe, futsi Wehlukaniswa naNkulunkulu, futsi kungako Amemeta, “UNgishiyeleni na?” Futsi ngoba Washiywa, futsi bekatsese lendzawo, futsi wababona bantfu baKhe, kutsi Beketele kutsi abe nguMsindzisi nekubanika kuPhila, bebaMencabile. Futsi kwaMvisa buhlungu kalusizi, kanjalo, waze Wadzabuka enhlitiywensi kwate kwatsi iNgati nemanti, nemakhemikhali emtimba waKhe, ehlukana.

<sup>31</sup> Umuntfu angeke ati kutsi loko kwakuyini. Kungalesosizatfu kwakungekho namunye lobekangafa kanjalo. Angikhatsali kutsi bewungaviswa buhlungu kakhulu kangakanani, kutsi bebangatifaka kanjani tinyawo takho esitulweni loboshelwa kuso, noma bakusahe, ngema-intji, noma bakushise ngema-intji; bewungeke ufe loko kufa, ngoba kwakhiwa kwakho akufani naloko. Bekafanele abe nguNkulunkulu. Bekafanele abe, ngetulu kwekuba ngumuntfu. Nekucabanga, kutsi, Nkulunkulu wafa. Wabulawa kudzabuka enhlitiywensi, ngalobuhlungu belusizi lobunjalo believe, kwaze kwatsi kusebenta kwekhemikhali lokwenteke emtimbeni waKhe kwakungeke kwenteke kuwe. Wawungeke uve buhlungu kanjalo. Ayikho indlela kuwe kutsi ungaba nalolohlobo lwebuhlungu belusizi. Ngako munye kuphela Lobekangakwenta, futsi Wakwenta.

<sup>32</sup> Nako kulenga, loko kuphila lokuligugu lokwakungati lutfo kuphela lutsandvo nekwenta lokulungile, kwalenga lapho emkhatsini wemaZulu nemhlaba, waphakanyiswa lapho, wahlutjulwa wabangcunu, wahlaazwa. Cabanga kutsi wawungabanjani nje, uhlutjulwe wabangcunu; wawungeke sewukwati kuhlazeka kuloko Nkulunkulu lebekangaba ngiko, alenga lapho. Ngiyati sitfombe sesiphambano sinentfo lencane, kungatsi bebanentfo letsite lebebaMvunulise yona, kodvwa abazange sebakwente loko. Loko nje kwembatsiswa nje esiphambanweni, noma umdvwebi wakubeka lapho. Bahlubula tonkhe timphahla taKhe kuYe. Bekakadze embetse ingubo lendze, futsi bayidzabula kuYe base bayayigembulela. Wahlazeka, kakhulu kakhulu. Noko, anguNkulunkulu, bekafanele eme, netoni tamKhafulela ebusweni. Noko, angiko—ngiko kanye nje kujula kwekutihlonipha, bekafanele afe embikwesive, wahlutjulwa wabangcunu. Kuphatseka kanjalo nje lokwabasetikwaKhe, kwate kwehlukanisa emanti neNgati. Akumangalisi... Ngicabanga kutsi lembongi yakuveta kahle ngesikhatsi itsi:

Emadvwala ladzabuka emkhatsini,  
 netibhakabhaka letibamnyama,  
 UMsindzisi wami wagebisa inhloko yaKhe  
 futsi wafa;  
 Kodvwa leveyili levulekako yembula indlela  
 Leya etinjabulweni taseZulwini nelusuku  
 lolungapheli.

<sup>33</sup> Impela, Bekafanele akwente. Iveyili yalenga emkhatsini wemuntfu naNkulunkulu, naleyoveyili levulekako yembula indlela leya etinjabulweni taseZulwini nelusuku lolungapheli. IKhalvari isho lokutsite, isho lokungetulu kwaloko lebesingakuveta. Impela.

Aphila, Wangitsandza. Afa, Wangisindzisa.  
 Angcwatjwa, Watfwala tono tami watiyisa  
 khashane le.

<sup>34</sup> Sesilahliwe manje. Sono asisenako kubambelela. Ngesikhatsi Amemeta kakhulu esiphambanweni, “Kuphelele,” sono saf! Manje sesifile. Sekuphelile ngaso. Asinamandla. Asinakuphila. Sicabangeni nje, bantfu. Lesosono, sitsa etidalweni letibantu, sifile futsi asinakuphila, asisasebenti. Singeke sisebente. Akumangalisi lilanga lavala kubona kwalo, tinkhanyeti atikhanyanga, umhlaba wagucuka wabamnyama, kwakuhlhengwa konkhe.

<sup>35</sup> Manje sifile, singcwatjiwe, asinakuphila. Asisenakuphila kuso, ngako-ke sifanele singcwatjwe. Yini leyangcwatjwa na? Umtimba waNkulunkulu wangcwatjwa, ngoba wawungumnikelo wesono. KwakuliWundlu lelishisiwe, washiswa yimililo yebubi. LeloWundlu lelingenasono lelalingati kwasasono, lowoNkulunkulu Lobekangati bubi; kuphila kwakhe kwakunikelwe ngako, futsi nako kulenga umnikelo wesono. “Angcwatjwa, Watfwala tono tami watiyisa khashane le.” Ufanele ungcwatjwe. Umtimba, umnikelo wesono ufanele ungcwatjwe.

<sup>36</sup> Kungako labanengi, emvakwesikhashana, batohamba, ngamunye ngamunye, bete kulelichibi, kutsi babhabbatiswe eGameni laJesu Khristu. Ngani na? Kukhona intfo leyentekile. LowoMoya lowaphuma kulowomtimba, ngesikhatsi Amemeta “kuphelele,” usilahlile sono emitimbeni yetfu. Futsi sifanele sisingewabe, kutsi singaphindzi sikhunjulwe. Ngijabula kakhulu kutsi sinjalo.

<sup>37</sup> Uma noma yini ingcwatjiwe, ifihliwe, ayibonwa ngumuntfu. “Futsi angcwatjwa, Wetfwala tono tami watiyisa khashane.” Nkulunkulu ngeke asatibona tono tetfu, ngoba tingcwatjiwe. Tingcwatjwe kuphi? ELwandle lwekuKhohlwa. Cabanga nje ngeLwandle lwekuKhohlwa! Nkulunkulu ngeke asatikhumbula, ngoba tingiko kokubili tifile futsi tingcwatjiwe. Ngeke

ngisho sisakhunjulwa nhlobo. Tiphumile enkhumbulweni yaNkulunkulu.

<sup>38</sup> Bekangiko futsi...kuloku “kungcwatjwa,” Wafanekiswa eThestamentini leLidzala. Bebanakubili...Bebanemnikelo wesono ekuhlantweni kwendzawo lengcwele. Nalowomnikelo wesono wawukutsi bebatsatsa timbuti letimbili, futsi yinye imbuti yayibulawa; nalelenye imbuti, yayinaletono lesasibekwa etikwembuti lefile sibekwe etikwembuti lephilako.

<sup>39</sup> Khumbulani, Jesu bekayiMvu. BekaliWundlu, kodvwa kulendzaba Uba yimbuti. Bekalungile ngoba BekanguNkulunkulu, iMvu. Kodvwa uba yimbuti, sono, kuze Abe ngumnikelo wesono sami nawe; esuka ekuben iyiMvu aye ekuben iymbuti.

<sup>40</sup> Futsi Jesu bekafanekiswa kutototimbili letilwane, timbuti totimbili: Ngoba yinye, wafa—wafela kubuyisana; yesibili, tono ekubuyisaneni sasibekwa embutini lesesulelo, nembuti lesesulelo yatsatsa tono tebantfu futsi yaya khashane yayongena ehlane, kutfwala tono tebantfu. Kwakuyini na? Kwakukufa nekungcwatjwa kweNkhosi yetfu Jesu. “Afa...Aphila, Wangitsandza. Afa, Wangisindzisa. Angcwatjwa, Watfwala tono tami watiyisa khashane le.” Watsatsa tono tebantfu watibeka etikwaKhe lucobo, futsi watitfwala wate wayotissi citsi phansi endzaweni lephansi kunato tonkhe yemahayidesi. Bekangumnikelo wesono. Bekenetono tebantfu. Wafela bona. Kantsi futsi tono sabekwa etikwaKhe, futsi Watsatsa tono tetfu watiyisa khashane le, khashane kakhulu kangangekutsi Nkulunkulu akazange asaphindze atibone. Kucabange nje! O, liBandla belingamemeta kakhulu, “Haleluya ngeMsindzisi lonjalo!”

<sup>41</sup> Akusiko kuphela kutsi tono tetfu titsetselelwe, kodvwa tingcwatjiwe eLwandle lwekuKhohlwa, kutsi tingabe tisakhunjulwa. “Angcwatjwa, Watfwala tono tetfu watiyisa khashane le.” Tingke nhlobo tisakhunjulwa, ngoba setihambile. Atisekho emehlwani aNkulunkulu. Tikhuatekile. Setidivosiwe. Tisusiwe. Nkulunkulu akasatikhumbuli. Ini? LiBandla belifanele litfokote manje ekuseni, kwati kutsi tono tetfu ngeke tisakhunjulwa. Tifakte eLwandle lwekuKhohlwa, tafakwa ethuneni langaleya kwanoma ngukuphi kuvuka. Tife kuze kube phakadze, futsi kwakhohlwakala ngato. Tinjengekutsi atikate tike tenteke. “Afa, Wangisindzisa.” Kodvwa, “Angcwatjwa, Watfwala tono tami watiyisa khashane le.” Watitfwala taya khashane kangangekutsi tate tayongena eLwandle lwekuKhohlwa. O! Siyati kutsi letotintfo tikholeka kakhulu impela emkhatsini wetfu, futsi tiliCiniso kakhulu impela. Tiliciniso laNkulunkulu. Tonkhe letotintfo letinkhulu tatingaleya kwekuvetwa ngumuntfu. Sasingeke nhlobo sikuvete kubonga kwetfu etintfweni letinjalo.

<sup>42</sup> Kodvwa, o, leloPhasika! “Avuka, Walungisisa ngesihle phakadze.”

Aphila, Wangitsandza. Afa, Wangisindzisa.  
Angewatjwa, Watfwala tono tami watiyisa  
khashane le. (Loko kwakulungile.)  
Kodvwa, avuka, Walungisisa.

<sup>43</sup> Kwakuyini loko kuvuka? Kwakusigcebhezane saNkulunkulu, kutsi sikweleti sibhadelwe. “Avuka, Walungisisa ngesihle phakadze.” O, uMsindzisi lonje pho, avuka! Bekenteni Nkulunkulu? Umuntfu angeva buhlungu, umuntfu angafa, umuntfu angangcwatjwa. Kodvwa liPhasika lalingulelikhulu kwendlula konkhe, ngoba lalikuphasisa kwaNkulunkulu, “Imitsetfo yaMi sekuhlangabetenwe nayo, tidzingeko taMi sesihlangabetiwe, lowo nguYe!” WaMvusa kulabafie! “Avuka, Walungisisa ngesihle phakadze.” Alibusiswe liGama laKhe leliNgcwele!

<sup>44</sup> Akumangalisi kuletsa emadlingozi! Akumangalisi inhlitiyo yemuntfu ingeke yakhona kukubamba! O, nekukholwa kwetfu lokuncobako singema ngaleya futsi sitsi, “Silungisiswe phakadze, ngesihle,” ngoba Wafa futsi wangcwatjwa, naNkulunkulu wabuye waMvusa futsi ekuseni ngeliPhasika. Khona-ke, Nkulunkulu wakhombisa kutsi Lemukelwa, tonkhe tintfo Latenta. Yonkhe intfo ikhokhelwe ngesihle, sewungahamba ukhululekile manje! “Avuka, Walungisisa ngesihle phakadze.” O, akekho longake ate angati, longake ake angacabangi ngalolosuku lolukhulu ngesikhatsi Avuka! NetiNgelosi takubona. EmaZulwini emazulu, tiNgelosi tahlabela tindvumiso taNkulunkulu, futsi tajabula; lapho labangcwele beliThestamenti leliDzala, ePharadesi, bamemeta, “Haleluya!” “Avuka, Walungisisa.” EmaZulu atamatama, umhlabu watamatama, ipharadesi yatamatama, neliZulu latamatama, ngesikhatsi leloPhimbo lelikhulu livela. Washo aphuma ethuneni Wavuka! “Avuka, Walungisisa ngesihle phakadze.” O, hhe!

<sup>45</sup> Ngako-ke labangcwele labafela kuYe bangahlabela leli, uma sibuka lowomusa lomangalisako, ngaleya, loko Lakwenta. Niyabona na? Kuvuma kwaNkulunkulu lokunamekwe ngeluphawu! “Kusesikhashana nje live lingeke lisaNgibona, noko nine nitoNgibona, ngoba Ngitovuka kulabafie futsi ngibe nani, ngibe kini, kuze kube sekupheleni kwemhlaba, njengesiciniseko, nekuhlolisisa loko Nkulunkulu latsi kuliciniso, naloko lengikushoko kutsi kuliciniso,” kwasho Jesu. “Ngiyofika ngesimo saMoya loyiNgcwele. Ngiyokwenta kuhlala kwaMi kube nani, futsi ngihlale nani phakadze.” Khona-ke labangcwele lonalelotsemba lekuvuka enhlitiyweni yabo, bangahlabela lengoma.

Nguloko kusa lokukhanya bha futsi  
 lokungenamafu lapho labafele kuKhristu  
 bayovuka,  
 Futsi babelane inkhatimulo yaloko kuvuka;  
 Lapho labakhetsiwe baKhe bayobutsana  
 eKhaya labo ngale kwesibhakabhaka,  
 (nesiciniseko lesiphelele, neluPhawu  
 lwaNkulunkulu, nesigcebhezane lesibhaliwe  
 lesivela kuNkulunkulu Cobo lwakhe)  
 Uma abitwa emagama etulu ngaleyia,  
 ngiyobakhona. (O, wota masinyane!)

O, akumangalisi batsi:

Aphila, Wangitsandza. Afa, Wangisindzisa.  
 Angcwatjwa, Wetfwala tono tami watiyisa  
 khashane le. O!  
 Avuka, Walungisisa ngesihle phakadze.

<sup>46</sup> Tono ticolelwe. Yonkhe lemihlatjelo ngabe yaba yinganekwane, yonkhe lemihlatjelo ngabe yehluleka. Kodvwa ekuseni ngeliPhasika, ngesikhatsi Avuka, Nkulunkulu wafakazela kutsi WaLemukela. Akumangalisi, kuletsa inhlitiyo yemuntfu kuhaleluya! Akumangalisi kwenta emadvodza eme ebusweni bekufa! Kwenta bantfu babite letotintfo letingekho, kwangatsi tatikhona! Kodvwa leni na? "Avuka, Walungisisa." Wati kanjani kutsi Uvukile? Ngoba, Uvuke etinhlitiywensi tetfu, walungisisa ngesihle phakadze!

<sup>47</sup> Etinsukwini letingemashumi lamane kamuva, ngesikhatsi Emile, akhulumwa nebantfwana baKhe, emandla ladvonsela phansi acala kulahkelwa kubamba kwavo. Imisebenti wafezwa. Inhlawulo yakhokhwa. Bekanesigcebhezane esandleni saKhe. Kwakusigcebhezane saNkulunkulu. Bekanebantfwana, liBandla, emakholwa. Sonkhe sono sanctotjwa. Indlela yentiwa yacaca. Bekangeke ahiale emhlabeni nhlobo. Yini lesibamba lapha na? Ngemdvonso wemhlabwa. Umdvonso wemhlabwa ucalwa kubhidlika, ulahkelwa kubamba kwavo ngci. Ngani na? Kwase kuperhile konkhe-ke ngalesosikhatsi. Kwentekani na? Ucalwa kuvuka emhlabeni.

<sup>48</sup> "Hambani niye eveni lonkhe, futsi nishumayele liVangeli kuko konkhe lokudaliwe," kuvela ekuphumiseleni kwetindzebe taKhe. "Hambani niye emhlabeni wonkhe, nishumayele liVangeli kuko konkhe lokudaliwe. Loyo lokholwako futsi abhabbatiswe uyosindziswa, loyo longakholwa uyolahlw. Naletibonakaliso leti tiyobalandzela labakholwako. NgeliGama laMi bayokhipha imimoya lemibi. Bayokhuluma ngetilimi letinsha. Uma baphatsa tinyoka noma banatse tintfo letibulalako, akuyubalimata. Uma babeka tandla tabo etikwalabagulako, bayosindza. Ngoba Ngiyaphila... Emandla emdvonso wemhlabwa adzabukile esuka kiMi. Sono

sasingenakubambelela. Nganifela. Nkulunkulu wakufakazela, futsi uniketa sigcebhezane sekuvuka. Futsi ngoba Ngiyaphila Mine, nani niyaphila! Ngalelinye lilanga Ngiyobuya."

<sup>49</sup> Ngalelinye lilanga Uyeta, o, lusuku lwenkhhatimulo! Ngakoke, munye... Aphila, afa, angcwatjwa, avuka, abuya, litsembe leliBandla namuhla!

Aphila, Wangitsandza. Afa, Wangisindzisa.  
 Angcwatjwa, Wetfwala tono tami watiyisa  
 khashane le.  
 Avuka, Walungisisa ngesihle phakadze.  
 Ngalelinye lilanga Uyabuya, o, lusuku  
 lwenkhhatimulo!

Kwakuyini na? Tintfo letisihlanu etinhlavini temagama letisihlanu, J-e-s-u.

Aphila, Wangitsandza. Afa, Wangisindzisa.  
 mine.  
 Angcwatjwa, Wetfwala tono tami watiyisa  
 khashane le.  
 Avuka, Walungisisa ngesihle phakadze.  
 Ngalelinye lilanga Uyabuya, o, lusuku  
 lwenkhhatimulo!

<sup>50</sup> Sibuke kuBuya kwaKhe kwesiBili!

Futsi ngalokunye kwalokusa lokukhanya bha  
 futsi lokungenamafu  
 Lapho labafele kuKhristu bayovuka,  
 Futsi babelane inkhatimulo yaloko kuvuka;  
 Lapho labakhetsiwe baKhe bayobutsana  
 emakhaya abo ngale kwesibhakabhaka,  
 Uma abitwa emagama etulu, ngiyobakhona.

Leni na? Ngingesigcebhezane. Wavuka! Wati kanjani na?  
 Uphila enhlitiyweni yami. Uphila etinhlitiyweni telibandla  
 laKhe lelikholwako.

<sup>51</sup> Kucabangeni, bangani. Lichibi litobe selilungile  
 emizuzwaneni lembalwa nje, nemanti lafutfumele, kwentelwe  
 inkonzo yembhabhatiso, masinyane nje uma sesibuya.

Asikhotsamise tinhloko tetfu kwemzuzwana nje.

<sup>52</sup> Ngiyatibuta namuhla, uma akhona munye emkhatsimi  
 wetfu, noma labanengi losengakawutfokoteli kwamanje  
 loMhlatjelo ngalokwenele kutsi aWemukele, futsi utsandza  
 kukhunjulwa emkhulekweni, kutsi Nkulunkulu utokhuluma  
 ngalokungakejwayeleki enhlitiyweni yakho, kutsi utowemukela  
 uMhlatjelo waKhe, kuhlantwa kwemphefumulo wakho.

<sup>53</sup> Futsi khumbulani kutsi namuhla sigubha hhayi nje sikhatsi  
 sekufaka tigcoko letinsha netimpahahla letinsha; lokuyinfo  
 lenhle, kuluphawu lwentfo letsite lensha. Nkulunkulu wenta  
 info letsite lensha. Lokukutsi, kulungile. Akusiko loko kuphela.

LiPhasika alichazi kona loko. Noma, kutingela, bologwaja bePhasika noma emacandza abologwaja, netinkhukhu letincane letimhlophé, nakanjalonjalo, lowo akusiwó lowomcondvo, mnaketfu.

<sup>54</sup> LiPhasika likuncoba, kukuncoba Nkulunkulu lakuniketa etikwemhlaba, kutsi Wavusa iNdvodzana yaKhe luCobo kulabafile. “Kutsi ngulowo nalowo lokholwa ngiYo, akanawubhubha, kodvwa abe nekuPhila lokuPhakadze.”

<sup>55</sup> Kuvuka ekufeni kungaba semphilweni yakho lucobo. Uma ungenako, ungasiphakamisela yini sandla sakho kuYe manje ekuseni, nisakhotsamise tinhloko tenu, ngekusho loku, “Nkulunkulu, ngikhumbule, kutsi loko kuPhila kwekuvuka ekufeni, kwangatsi Kona bekungaba khona enhlitiyweni yami.” Ungasiphakamisa sandla sakho futsi utsi, “Ngikhulekele, Mnaketfu Branham, njengoba ngiphakamisa sandla sami”? INkhosi ikubusise. INkhosi ikubusise. Ngabe ukhona yini lomunye lotophakamisa sandla sakho, utsi, “Ngikhulekele, mnaketfu, ngifuna kukwemukela lokuPhila loku kwekuvuka ekufeni”?

Ngaloko kusa lokukhanya bha futsi  
lokungenamafu, (kucabange nje manje lapho  
sisa . . . . .) . . . Khristu bayovuka,  
Futsi babelane inkhatimulo yaloko kuvuka;  
Lapho labakhetwiwe bayobutsana ngale  
kulolunye lugu,  
Uma abitwa emagama etulu, ngiyobakhona.

Uma abitwa emagama etulu laphaya,  
Uma abitwa emagama etulu laphaya,  
(Manje uma ungakaciniseki, kulungise,  
manje.) . . . abitwa etulu laphaya,  
Uma abitwa emagama etulu laphaya,  
ngiyobakhona.

Asisebentele iNkhosi kusukela . . . (Loku  
kubhekiswe kini bangcwele) . . . lilanga,  
Asikhulum . . .

<sup>56</sup> Manje, kini nine leningemaKhristu, lofuná kwenta sifungo kuNkulunkulu, kusebenta kakhulu; wota wehle, phakamisela sandla sakho kuYe.

Nemagama abitwa etulu laphaya,  
ngiyobakhona. (INkhosi ikubusise.)

Uma abitwa emagama etulu laphaya,  
ngiyobakhona.

<sup>57</sup> Nkulunkulu Lotsandzekako, Ubone yonkhe inhlitiyo ekhatsi lapha, futsi Uyatati tinjongo netinhloso. Futsi ngikhulekela sihawu. Nkulunkulu, siphe kona, kutsi sihawu sitobonakaliswa kulabantfu laba. Betime manje ekuseni kuleli-awa lekukhonta. Bete ku—kulendzawo kutokuva Livi laKho.

<sup>58</sup> Futsi njengoba sikhulumile, kutsi, ngesikhatsi Uphila, yayingakaze ibekhona imphilo lenjengeyaKho. Ufa, wawuNguwe kuphela Lobekangafa ngalolwahlobo. Ngesikhatsi Ungewatjwa, Wetfwala tono tefu watiyisa khashane le; unetono tebantfu etikwaKho, Watitsatsa watiyisa eLwandle lwekuKhohlwa. Kodvwa, ekuvukeni, Walungisisa ngesihle phakadze. Futsi sime, namuhla, silindze kuBuya kwaKho.

<sup>59</sup> Nkulunkulu, babusise. Sisite. Siyacondza kutsi asisenaso lesinye sikhatsi lesinengi kakhulu, ngoba yini sekusemnyango. Futsi noma yini... Futsi li-awa linye kusukela manje, ngekusho kwabososayensi, tive tingahle tibe tingasekho. Futsi siyakhuleka, Nkulunkulu, njengoba simile, kuleliPhasika manje ekuseni etikwemngcengcema wekuBuya kwaKhe, litsembe leliBandla. Tinkhulungwane letinengi tilele ngaleya elutfulimi lwemhlabo, tilindzele lelo-awa, imiphefumulo yabo ngephansi kwe-altari, imemeta, "Kuyoze kube nini, Nkhosi? Kuyoze kube nini na?" Ngiyakhuleka, Nkulunkulu, kutsi Utokhuluma kitsi. Futsi asikhumbule kutsi akunandzaba kutsi yini lesike siyente lapha emhlabeni, kuncane kabi. Futsi intfo kuphela lesingayenta manje, kukulindzela kuBuya kwaKho, futsi sitjele wonkhe umuntfu. LoMlayeto uyaphutfuma. Kwangatsi singawufinyelelisa kubantfu, ngekushesha, kutsi Ungahle ubuye noma ngasiphi sikhatsi. Ngaphambi kwekutsi lamabhomu labakhuluma ngawo, naletinjumbane leti, tingaba yimvula yetinkhulungwane tato tilele etikwemhlabo ngesikhatsi lesingumzuzu munye; ngaphambi kwekutsi loko kwenteke, Wena wetsembise kubuya, Nkhosi, utsatse bantfu baKho. Kuyoba ngaleyondlela, Nkhosi. Ngako, impela noma ngamuphi umzuzu, kungaba khona kuvuka ekufeni, liPhasika leliBandla; kuvuka kulokuphila lokunesono, siye ekuPhileni lokuPhakadze, ngaKhristu. Vani imikhuleko yetfu.

<sup>60</sup> Futsi namuhla, njengoba sichubeka siyongena kuletinye tinkonzo ekufundziseni kwaSontfo sikolwa, O Nkhosi, khuluma futsi, futsi kwangatsi tinhlitiyo letinengi tingecwayiswa ngalokungakejwayeleki. Futsi kwangatsi bangeta ngemadazini, kulelichibi manje ekuseni, lokusa loku kwaleliPhasika, kutsi simbelwe neNkhosi Jesu, semukela uMhlatjelo waYo. Akunandzaba kutsi babandla lini, noma nguliphi lihlelo lenkholo labahlanganyela nalo, loko akusho lutfo. Kodvwa ngabe bawemukele yini lowoMhlatjelo na? Ngabe bayakuvuma yini kutsi abakalungi, kutsi Jesu bekanguYe kuphela lobekalungile na? Futsi Wafela tsine, esikhundleni setfu. Futsi Watsatsa tono tefu futsi watingcwaba, futsi tsine sime sodvwa

kuYe. Emabandla etfu angeke atingcwabe tono tetfu, kuphila kwetfu lucobo ngeke kutingcwabe tono tetfu, kodvwa Khristu wangcwaba tono tetfu eLwandle lwekuKhohlwa. Nkulunkulu, siphe manje kutsi letintfo leti titoba yinkhatimulo ebusweni baKho.

<sup>61</sup> Bese kutsi kusihlwa, Nkhosi, kwangatsi Ungeta ngemandla ekuvuka kwaKho, futsi utamatamise lendzawo lencane kubengatsi ayikaze itanyatanyiswe. Kwangatsi tibonakaliso netimanga kungabonakala. Kuphindze, njengoba kwakunjalo emaSontfweni lambadlwana lendlulile, Nkhosi, lapho labagulako nalabahlaselekile basindziswa ngalokumangalisako. Sikhulekela kutsi kutobakhona futsi kusihlwa, ngenca yenkhitimulo yaKho, Nkhosi.

<sup>62</sup> Sitsetselele tiphambeko tetfu manje, Nkhosi, futsi kwangatsi leli kungaba liPhasika sibili kulabanye betfu, liPhasika sibili letfu sonkhe. Nalabanye balabo labangakaze batu kutsi tibusiso teliPhasika kwakuyini, kwangatsi kungaba ngunamuhla lapho Khristu avuka khona enhlitiywemi yabo, nelitsema lelisha, nekuPhila lokusha. Kubakhombise eKhalvari. Ngoba sikucela, eGameni laJesu. Ameni.

<sup>63</sup> [Akucoshwanga etheyiphini—Umhl.]...kubanalesikhatsi lesi senhlanganyelo. Bangakhi kini labatsanza iNkhosi? Phakamisa sandla sakho nje. O, hhe, loko kuhle kakhulu!

<sup>64</sup> Ngiyeva kutsi nineluswane lolutobusiswa, Mnaketfu McDowell. Utobuya enkonzwensi yaSontfo sikolwa, ungakhona na? Kulungile, loko kutoba kuhle. Ngulesosikhatsi lesitobusisa ngaso letinswane nakanjalonjalo, ngalesosikhatsi, uma kungakukhatsati, loko kulungile.

<sup>65</sup> Futsi ngako manje sitokhulula letetsameli imizuzwana lembalwa, kuze nikhone kuya etindzaweni tenu bese niba nekudla kwenu kwasekuseni, bese niyabuya futsi. Siyajabula kutsi benilapha.

<sup>66</sup> Futsi manje asime nje. Naleloculo lelifanako lesibe nalo emizuzwaneni lembalwa leyendlulile, “Ngaloko lokukhanya bha nalokute emafu...” Bangakhi lonalelotsema kubo? Asinibone niphakamisa tandla tenu. Sukumani.

...kwalokusa lokukhanya bha futsi  
lokungenamafu (Hlabelani kakhulu manje.)  
...lapho labafele kuKhristu bayovuka,  
Futsi babelane inkhatimulo yaloko kuvuka;  
Lapho labasindzisiwe basemhlabeni  
bayobutsana ngale kulolunye luhlangotsi,  
Nemagama abitwa etulu laphaya,  
ngiyobakhona.

Uma abitwa emagama etulu laphaya,  
 ngiyobakhona.

<sup>67</sup> Manje, sisahlabela lelivesi lelilandzelako: “Asisebentele iNkhosi, kusukela ekuseni kute kubeseleshoneni kwelilanga, asikhulumeni,” (hhayi ngetintfo telive) “kodvwa, asikhulumeni ngetimanga taKhe, lutsandvo nekukhatsalela.”

Sisenta loku, chawulana nalomunye losemvakwakho, embikwakho, eceleni kwakho. Asesente loko manje. Tsani, “Sawubona ekuseni, mngani longumKhristu, ngiyatfokota kubasenkonzweni nawe.” Kulungile.

Asisebentele iNkhosi kusukela . . .  
 . . . ngelutsandvo lwaYo lolusimangaliso  
 nekunakekela;  
 Khona-ke kuyotsi uma kuphila sekuphelile,  
 nemsebenti wetfu emhlabeni sewuphelile,  
 Nemagama abitwa etulu laphaya,  
 ngiyobakhona.  
 Uma abitwa emagama etulu laphaya,  
 Uma abitwa emagama . . .  
 . . . etulu laphaya,  
 Uma abitwa emagama etulu laphaya,  
 ngiyobakhona.

Leni na? Siyoba lapho kanjani na? Ngoba: “Aphila, Wangitsandza. Afa, Wangisindzisa. Angcwatjwa, Wetfwala tono tami watiyisa khashane le. Avuka, Walungisia ngesihle phakadze. Ngalelinye lilanga Uyabuya, o, lusuku lwenkhatimulo.”

Uma abitwa emagama etulu laphaya,  
 ngiyobakhona. (Sinesigcebhezane.)  
 . . . abitwa emagama . . . ngaley,  
 Uma abitwa emagama etulu laphaya,  
 Uma abitwa emagama etulu laphaya,  
 Uma abitwa emagama etulu laphaya,  
 ngiyobakhona.

Asikhotsamise tinhloko tetfu.

<sup>68</sup> Nkhosi, lokunye kusa lokukhanya bha futsi lokungenamafu, uma sibona lowomushi wenkosazana uta esibhakkabakeni (Luphawu lwesivumelwano saNkulunkulu, sivumelwano saphakadze: Usigcinile setsembiso saKhe.), khona-ke sitobuka, kuta, nelitje lelithuna litobe liwa lidedela emuva, nalabo labalala elutfulini lwemhlaba bayovuka kwabelana inkhatimulo yeliPhasika lekucala kanye naYe, Lowente kwenteka, iNkhosi yetfu. Siyakubonga Wena ngaloko, Nkhosi. Ngitfokote kakhulu,

Nkhosi, kutsi litsemba lilele esifubeni sami. Ngoba ngiyawabona emahlombe ami agobana, Nkhosi, ne—nekuguga kucala kunginyenyela; Ngisetulu esicongweni seligcuma, ngibuka ngale manje. Nkhosi, ngitfokote kakhulu kutsi litsemba liyashisa ngekhatsi kimi. Ngalelinye lilanga Uyobuya. Ngitfokota kakhulu kutsi kunalabanengi lapha namuhla labativela ngendlela lefanako.

<sup>69</sup> Ngiyakhuleka, Nkhosi, kutsi Utosipha lusuku lolukhulu, namuhla, usitsetselela tonkhe tiphambeko tetfu, sisavuma emaphutsa etfu, futsi sivuma kutsi asikafaneli. Kodvwa kuwa kwaKhristu, kungcwatjwa, kuvuka ekufeni, kwafakazela kitsi ngeMoya waKhe kutsi uvukile etinhltiywenu tefu, asenta bahlanganyeli bekuvuka kwaKhe ekufeni, futsi sinesibambiso sekuvuka ekufeni kwetfu etinhltiywenu tefu manje. Ngoba kusuka esonweni, sesifile, futsi sesingene ekuPhileni lokusha, futsi sivukile etintfwenu letindzala telive savukela ekuPhileni lokusha. Sibambiso, sibekelo, O Nkhosi, si—sibambiso sekuvuka kwetfu ekufeni.

<sup>70</sup> Sijabula kakhulu kukuva nekukutfokotela kulomunye nalomunye. Letintfo leti, sitibamba njengemagugu etinhltiyo tefu, intfo letsite ngisho imali lengeke ikhone kuyitsenga, live lelingeke likhone kuyicisha iphele, ngoba Nkulunkulu wasinika yona ngesihle, ngesihle ngangoba Khristu ayifela.

<sup>71</sup> Manje, siyakhuleka kutsi Utobanatsi manje ekuseni. Sisite, manje, kutsi siphumule imizuzwana lembalwa, bese siyabuya. Siphe inkonzon lenkhulu lelandzelako. Ngoba sikucela, eGameni laKhe, Lowasifundzisa kukhuleka ndzawonye [UMnaketfu Branham nelibandla bakhuleka kanyekanye—Umhl.]: Babe wetfu LoseZulwini, Malingcweliswe liGama laKho. Umbuso Wakho awute. Intsandvo yakho yentiwe emhlabeni, njengoba yentiwa eZulwini. Siphe namuhla sinkhwa setfu semihla ngemihla. Futsi sitsetselele emaphutsa etfu, njengoba natsi sibatsetselele labo labasonako. Futsi ungasingenisi ekulingweni, kodvwa usikhulule kulokubi: Ngoba uMbuso ungewaKho, nemandla, nenkhatimulo, kuze kube phakadze. Ameni.

<sup>72</sup> INkhosi inibusise, manje, size sinibone futsi, cishe nge... nase igabence insimbi yemfica. Chawulana nalomunye nalomunye; futsi sitonibona nase igabence insimbi yemfica. 

*APHILA, AFA, ANGCWATJWA, AVUKA, ABUYA* SSW59-0329s  
(Living, Dying, Buried, Rising, Coming)  
LUCHUNGECHUNGE LWEAMILAYETO YEPhASiKA

LoMlayeto ngeMnaketfu William Marrion Branham, kwekulala wetfulwa ngesiNgisi ngeliSontfo ekuseni ekuphumeni kwelilanga, ngenyanga yeNdlovulenkhulu 29, 1959, eTabernakeli laBranham eJeffersonville, eIndiana, eU.S.A., utsatselwe ekucopheni kwetheyiphu lenamazibuthe futsi wakhicitwa ungakafinyetwa ngesiNgisi. Luku kuhunyushwa ngeSiSwati kwakhicitwa kwakhishwa yiVoice Of God Recordings.

SWATI

©2018 VGR, ALL RIGHTS RESERVED

VOICE OF GOD RECORDINGS, SOUTH AFRICA OFFICE  
58 DISA ROAD, ADMIRAL'S PARK, GORDON'S BAY 7140 WESTERN CAPE  
REPUBLIC OF SOUTH AFRICA

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Inotsisi yelilungelo lemtsetfo

Onkhe emalungelo agodliwe. Lencwadzi ingaprintwa ngeprinta yasekhaya yentelwe kutsi umuntfu atisebentisele yena noma kutsi iniketwe labanye, mahhala, njengelithulusi lekusabalalisa liVangeli laJesu Khristu. Lencwadzi akukamele itsengiswe, iphindze ikhicitwe tibetinengi, iposwe kuwebsayithi, igcinwe ngeluhlelo lwekutsi iphindze itfolakale, ihunyushelwe kuletinye tilwimi, noma isetjentiselwe kuticelela timali ngaphandle kwemvumo lebhaliwe lecondzile ye Voice Of God Recordings®.

Mayelana nelwati lolwenetiwe noma lwalwenye impahla lekhona, sita uchumane ne:

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)